



Inuussutissarsiornermut Ataatsimiititaliaq  
/ MAANI

UKA 2016/29  
Ilangussaq 2

**Imm. 29, Suliffeqarfiit pillugit Qitiusumik Nalunaarsuiffimmik Inuussutissarsiornermut  
Ataatsimiititaliamit apeqqutit**

25-10-2016  
Sags nr. 2016 - 3151

Postboks 1601  
3900 Nuuk  
Tlf. (+299) 34 50 00  
Fax (+299) 32 56 00  
E-mail: isiin@nanoq.gl  
www.nanoq.gl

Imm. 29-mut tunngatillugu apeqqutinut nassiussanut qujavugut.

Ad 1 aamma 2) *Nalunaarsugaanermut tunngatillugu malittarisassat Inatsisartut  
inatsisaanni aalajangersarneqartarput CVR-imut inatsisip kunngip peqqussutaatigut  
atuuttusaanngortinnera pinnagu.*

Siunnersuummik piareersaatigut suliaqarnermut atatillugu, ilanngullugit Erhvervs- og  
Selskabsstyrelsimik (Inuussutissarsiornermut Ingerlatseqatigiiffinnullu  
Aqutsisoqatigiinnik), kiisalu Erhvervs- og Vækstministereqarfimmik  
(Inuussutissarsiornermut Siuarsarnermullu Ministereqarfimmik) oqaloqatigisaqarnerit  
ilanngullugit suliffeqarfinnik nalunaarsuisarnerup suliassaqarfittut tiguneqarsimanera  
paasineqarsimavoq, tassani Namminersorlutik Oqartussat suliassaqarfimmi  
malittarisassianik aalajangersaanissamut tamakkiisumik piginnaatitaanermik  
tigusaqarsimallutik.

CVR-imut inatsimmi peqqussuteqarnermut aalajangersagaq tunngavigalugu  
aallaqqaataani CVR-imut inatsisip kunngip peqqussutaatigut  
atuutsinneqalersinnaaneramik aamma atuutsinneqalertussaaneramik  
naatsorsuuteqartoqarsimanera eqqortuuvoq.

Tassunga atatillugu Erhvervs- og Selskabsstyrelsimi pisortap tullianit allakkat  
ilanngullugit nassiunneqartut innersuutigaakka, tassani apeqqut tamanna Justits- og  
Statsministereqarfillu oqaluuserineqarsimanera aamma takuneqarsinnaalluni.

Taamaattumik suliffinnik nalunaarsuisarnermik suliassaqarfiup tiguneqarsimasuunera,  
tassani Namminersorlutik Oqartussat tamatumunnga tunngasunik malittarisassianik  
tamanik aalajangersaasarnissamut piginnaatitaanerit Naalakkersuisut aamma  
Danmarkimi naalakkersuisut akornanni isumaqatigiittoqarpoq.

Ad 3) *Siuliani allassimasut eqqarsaatigalugit suliassaqarfimmi pineqartumi  
maleruagassat Kalaallit Nunaannit atuutsinneqalersut kingornagut danskit  
oqartussaasuinit, tassungalu ilanngullugu Erhvervs- og Selskabsstyrelsimi*

*oqaluuserineqartariaqarnerannik immaqalu akuerineqartariaqarnerannik nassataqassanngitsut Naalakkersuisut uppersarsinnaavaat?*

Qulaani pineqartutut suliffeqarfinnik nalunaarsuisarnermut tunngatillugu malittarisassianik aalajangersaanissamut Namminersorlutik Oqartussat tamakkiisumik piginnaatinneqarnerat pillugu Naalakkersuisut aamma Danmarkimi naalakkersuisut akornanni isumaqatigiittoqarpoq. Taamaattumik tamanna pillugu malittarisassianik aalajangerneqartunik Danmarkimi oqartussaasut akuersissuteqassanngillat.

*Ad 4) Danmarkimi oqartussat tusarniaavigineri*

Qulaani aamma Erhvervs- og Selskabsstyrelsimit allakkani ilanngunneqartuni takuneqarsinnaasutut siunnersuut Naalakkersuisunit aamma Danmarkimi naalakkersuisunit suleqatigiissitaliamit inassutaasumik siunnersuut tunngaveqartinneqarpoq. Paasiniaanermik suliaqarnermi Justitsministereqarfik (Inatsisunik atuutsitsinermit Ministereqarfik) aamma Statsministereqarfik peqataasimapput. Suliffeqarfinnik nalunaarsuisarnermut malittarisassianik aalajangersaasarnermut Namminersorlutik Oqartussat piginnaatitaanerannik isumaqataasut Erhvervs- og Selskabsstyrelse aamma Erhvervs- og Vækstministereqarfik suleqatigalugit siunnersuut suliarineqarpoq. Siunnersuut Danmarkimi pissutsinut tunngassuteqanngilaq, kisianni Kalaallit Nunaanni suliffeqarfinnut immikkoortortanullu pisussaaffinnik aalajangersaavoq. Taamaalillutik Danmarkimi naalagaaffillu inatsisiliornermut tunngassusilittut sinaakkutissat paasineqarsimalermata siunnersuut Danmarkimi pisortanut tusarniaassutigalugu nassiunneqarsimanngilaq.

*Ad 5) Inatsisissatut siunnersuutip matuma nassatarissavaa nunatsinni Inuusutissarsiummik Ingerlataqartunik Nalunaarsuiffik atorunnaarsinneqassammata nunatsinnilu suliffeqarfiit il.il. qitiusumik suliffeqarfinnik nalunaarsuiffimmi nalunaarsorneqassammata. Tamanna oqartussaaffimmik Danmarkimut utertitsinertut paasineqarsinnaasorinarpoq. Taama paasinninneq kukkunerusutut Naalakkersuisunit isigineqarpa?*

Soorlu qulaani nalunaarsugaasutut suliffeqarfinnik nalunaarsuinermit tunngatillugu malittarisassianik aalajangersaanissamik Namminersorlutik Oqartussat piginnaatitaanerat Naalakkersuisut aamma Danmarkimi naalakkersuisut isumagaat. Suleqatigiinnit inassutaasup malitsigisaatut CVR-imik atuinermut attuumassuteqartunik iluaqutissanik arlalinnik peqassaaq, taanna nutarteqqammerlunilu paasissutissanik aallersinnaanermit periarfissanik nutaanik arlalinnik pitsanngorsaavigineqarluni.

IIN-ip pisoqalisimanera isumatigiissutaavoq, aaqqiissummillu nutaamik pisiaqarnermut taarsiullugu nalunaarsuiffiup atugarineqartariikkat atornissaa malunnartumik akikinnerusussaavoq.

Taamaalillutik nalunaarsuinermit tunngatillugu Namminersorlutik Oqartussat malittarisassianik tamanik aalajangersaapput, ilanngullugu CVR-ip atugaassanera pillugu. Tassunga atatillugu Danmarkimi pisortat malittarisassianik aalajangersaanissamut piginnaatitaaffeqanngillat, taamaalillunilu Danmarkimut piginnaatitaaffimmik uterteqqittoqanngilaq. Iluarsiiisuttip assigaa paasisutissanik toqqorsisarnerq pillugu nalunaarsuisarfimmik piginnittumik allamik Namminersorlutik Oqartussat isumaqatigiisummik atsiuqateqarneranut.

*Ad 6) Qitiusumik suliffeqarfinnik nalunaarsuiffik atuutsilerniarlugu siusinnerusukkut siunissamut takussutissianik suliaqartoqarsimasooq ataatsimiititaliap suliaqarnermini paasivaa, tamatumani qitiusumik suliffeqarfik nalunaarsuiffik kunngip peqqussutaatigut atuutsinneqalernissaa eqqarsaatigineqarluni. Taama eqqarsaatigarneq Naalakkersuisunut inassuteqaammi 09-06.2014-imeersumi, suliaq nr.: 2013-0889471, allassimasooq ataatsimiititaliamit maluginiarneqarpoq. Tassunga atatillugu tamatuma kingorna periusioqqaartup malinniarneqarsimannginneranut tunuliaqutarineqartoq tunngavilersuutilu naatsumik nassuiaatigineqassasut ataatsimiititaliap inussiarnersumik qinnutigaa.*

Qulaani nalunaarsorneqartutut aallaqqaataani CVR-imut inatsisip kunngip peqqussutaatigut atuutsilerneqarsinnaanera pillugu naatsorsuutigisaq aallaavigalugu suliaqartoqartoq eqqortuuvoq. Danmarkimili pisorta qarfinnik attuumassuteqartunik oqaloqateqarnerup aallartinnera sioqqullugu tamanna pivoq. Oqaatigineqartutut suliffeqarfinnik nalunaarsuisarnerup tigusimasatut suliassa qarfiunera pillugu Naalakkersuisut aamma Danmarkimi naalakkersuisut akornanni isumaqatigiittoqarpoq, taamaattumik eqqortumik periusissaq tassaalluni Inatsisartut inatsissaannik saqqummiussineq.

Inussiarnersumik inuulluaqqusillunga



Vittus Qujaukitsoq